

Cunsëi nuef per la Lia guanc dala gherdëina

Ancunteda generela cun veles dl cunsëi nuef dla Lia guanc dala gherdëina de Urtijëi. Atività via per l'ann. Veles dl cunsëi nuef



I cumëmbri dla Lia guanc dala gherdëina de Urtijëi n ucajian dla festa da d'instà a Cianacei ai 4 de setëMBER 2011, deberieda cun i cumëmbri dla lies guanc dala gherdëina de Sëlva y de S. Cristina.

Urtijëi/Lies - N venerdì ai 20 de auril à la Lia guanc dala gherdëina Urtijëi tenì si senteda generela. Do l salut da pert dla presidënta Sandra Comploj al ambolt Ewald Moroder, al'assessëura per la cultura Lara Moroder y a duc i prejënc, à la presidënta ulù rengrazië l'aministrazion cumenela, la Lia per l Turism, l cunsëi y duc i cumëmbri dla Lia per si sustëni.

Mpurtaanza culturela

L ambolt Ewald Moroder à auzà ora la mpurtaanza culturela dla Lia per Urtijëi, che se cruzia de abeli la festes cun la prejënza dla trohtes de marueia che fej plajëi ai zitadins y nce ai seniëures che cun legrëza ti fej fotografies. L ambolt à segurà inant l sustëni dl'aministrazion cumenela per l'atività dla Lia. Nce l'assessëura per la cultura Lara Moroder à auza ora l merit dla Lia che dà n contribut mpurtant per mantëni vives nosta tradizions, recunescian l gran mpëni de duc chëi che porta, njënia ca cun lezitànza y cëla che l vënie mantëni drët bën i bieci guanc dala gherdëina.

Atività tl 2011

La presidënta Sandra Comploj à purtà dant l'ativiteies che la Lia à fat ntan l'ann 2011: la Lia à fat pea pra la pruzescions tl luech, pra la S. Mëssa dla Segra y la S. Mëssa ai 15 de agost, n la Festa dla Madona, y pra defiledes d'uni sort l zënter de Urtijëi. Plu manifestazions ududes dant a Urtijëi ie unides desdites ntan l instà 2011 pervia dla plueia. Purtrüep iel uni desdit, cun gran mueia di cumëmbri dla Lia, nce la defileda de "Gröden in Tracht" che fossa tl 2011 stata a Urtijëi. N pudëssa pensé tl daunì a avëi a despusizion la gran sala dla Cësa

de cultura tla ucajian de chësta gran manifestazion, per pudëi astilè ora iló sce l fossa bur' tëmp. Bela ie nce stata la partezipazion ala festa da d'instà a Cianacei n dumënia ai 4 de setëMBER, ulache l fova prejënt duta trëi la lies guanc dala gherdëina de Urtijëi, Santa Cristina y Sëlva y ulache l tëmp à iusta lascià fé la defileda, dan che l ëssa scumencià a pluëi. Chësta ie nce stata na blòta ucajian d'ancunteda danter i cumëmbri de duta la trëi lies dla valeda. Ntan la sëira à la presidënta rengrazià dassënn l'aministrazion cumenela ajache cun n si cuntribut à la Lia pudù cumpré doi baganes, una da d'ëila y una da d'ël, che possa sën uni mpstedes ora ai zitadins che à nteres da jì cun la troht.

La presidënta ti à pona dat la parola ala vizepresidënta Franziska Beikircher, deberieda cun Manuela Grones y Bruna Pitscheider respunsabla di guanc che vën mpstëi ora dala Lia. Èila a cuntà di lëures che ëiles à fat ntan l'ann 2011 per mantëni i guanc: n à lavà o lascià puzenè i guanc, n à cumedà su y fat da nuef vel' pez, coche culeres, ciamëjjes, camesëui, doi gherlandes spizes.

La presidënta à pona liet dant l'program per l'instà 2012, ulache la Lia fajerà inò pea pra la pruzescions tl luech y pra la manifestazions cultureles. L'program plu avisa unirà mandà ora ai cumëmbri tla proscima enes, do che n arà fat ora la ncëries dl cunsëi nuef.

Plata web dla Lia y documentazion fotografica dla troht y de coche n se furnësc

Patrizia Ciechi à cuntà di lëures che ie unii fai nchin sën per njenië ca la plata web per la Lia, che vëija dant na plata de bënunì cun i culëures dl Chemun de Urtijëi y

l simbol dla Lia. N gran lëur che vën fat cun l sustëni de Claudio Cainelli dl Fotoclub Gherdëina ie che l vën fat fotografies de duc i pec, guanc, antlaries, ciapel, che toca pra uni troht y de uni var che n fej per se furnì a puntin. Chësta documentazion dëssa ti judé a chiche uel cialé do coche uni troht muessa uni trata sëura y dëssa mantëni l vedl savëi lià ai guanc dala gherdëina.

Veles dl cunsëi nuef

La presidënta a pona rujenà dl bilanz, rengrazian la Lia per l Turism y duc chëi che à dat n sustëni ala Lia. Per l 2012 dajëràn ora tesseress per permëter ala Lia de avëi n sustëni y savëi ciuni che ie i cumëmbri dla Lia.

Per finé via iesen passei ala veles dl cunsëi nuef, damandan ai prejënc sce l fossa vel' nteressada o nteressà che ulëssa fé pert dl cunsëi, davia che Maria Delago y Werner Bernardi ulova zapé ora. Coche candidac se à metù a despusizion Sandra Comploj, Franziska Beikircher, Manuela Grones, Bruna Pitscheider, Patrizia Ciechi, Maria Christina Mussner, Michele Fletcher Demetz, y coche candidac nueves se à lascià mëter sun lista Marisa Colcuc Peristi y Helmuth Welponer. I candidac nueves ie unii litei cun duc a una y tol l'ucajian de rengrazë nce tres la USC i cumëmbri dla crëta che ti ie unida data.

L ambolt Ewald Moroder ti à mbincià al cunsëi nuef dut l bon per si attività y trüepa legrëza. Per duc fòvel ala fin njenià velch da pestlé y da bever y nscila à passà mo na blòta sëira deberieda a s'la cunté.

Patrizia Ciechi